



## **BASES E CONVOCATORIA DO CONCURSO DE COMPARSAS E CARROZAS DO ENTROIDO 2020.**

*(Aprobadas pola Xunta de Goberno local na súa sesión do 30 de xaneiro de 2020).*

**Prazo de inscrición:** do 3 ao 14 de febreiro de 2020.

**Primeira.-** O Servizo de Festas da Concellería de Festas e Turismo do Concello de Vigo e a Comisión organizadora do Entroido 2020 convocan o tradicional concurso de comparsas e carrozas que se realizará **o sábado 22 de febreiro**, dentro do programa de actividades e espectáculos do **Entroido 2020**. Neste concurso so poderán inscribirse aquelas comparsas integradas por un mínimo de 35 persoas.

**Segunda.-** As persoas físicas poderán presentar as súas solicitudes de inscrición a través do Rexistro Xeral do Concello de Vigo (Praza do Rei, 1) en horario de 09:00h a 13:30 horas, de luns a venres, ou por calquera dos medios previstos no artigo 16,4 da Lei 39/2015, do 1 de outubro, de Procedemento Administrativo Común das Administracións Públicas (LPAC), ou a través de medios electrónicos, en base ao establecido no artigo 14, apartado 1) da mesma Lei que indica “*as persoas físicas poderán elixir en todo momento si se comunican coas Administracións Públicas para o exercicio dos seus dereitos e obrigas a través de medios electrónicos*”.

As persoas xurídicas e as entidades sen personalidade xurídica en cumprimento do establecido no artigo 14.1.2. da devandita lei terán que presentar as solicitudes de inscrición a través da Sede electrónica do Concello de Vigo ([sede.vigo.org](http://sede.vigo.org)), en impreso normalizado para este fin. No caso de que se achegue a documentación de forma presencial, requirirase a súa corrección mediante a súa presentación electrónica. A estes efectos, considérase como data de presentación da documentación aquela na que tivese realizada a corrección.

O prazo de presentación das solicitudes será de 10 días hábiles, contados desde o día seguinte á publicación desta convocatoria na forma e nos termos previstos na mesma.

Todas aquelas solicitudes presentadas fóra deste prazo serán desestimadas calquera que sexa a causa do seu atraso.

As bases de participación neste concurso publicitaranse a través de anuncio nos medios de comunicación locais e estarán a disposición das/os interesadas/os na na páxina web municipal [www.vigo.org](http://www.vigo.org)

**Terceira.-** Os premios establecidos para o concurso serán os seguintes:

### PREMIOS XERAIS:

- 1º PREMIO: 3.000,00 €
- 2º PREMIO: 2.500,00 €
- 3º PREMIO: 2.000,00 €

### 14 ACCÉSIT non acumulables aos tres primeiros premios de:

- 1.000,00 euros para as seguintes comparsas por orde de puntuación.

As comparsas que non resultasen premiadas nin cos tres primeiros premios nin cos accésit recibirán a cantidade de 200 € en compensación dos gastos de desprazamento, ata un máximo de inscrición de 30 comparsas.

Os premios serán indivisibles e algúns deles poderán quedar desertos, sobre todo no caso dos accésit, segundo a decisión do xurado do concurso. En caso de empate decidirá o voto de calidade do presidente do xurado.

Os aboamentos dos premios serán tramitados pola comisión organizadora do **Entroido 2020**, constituída pola Agrupación de Centros Deportivos e Culturais e pola Federación de Peñas Recreativas “El Olivo” dentro dun prazo máximo de 90 días, unha vez recibida a acta do xurado e estarán suxeitos á normativa fiscal que corresponda.

**Cuarta.**- O número da orde das comparsas inscritas no desfile asignarase mediante sorteo público. O sorteo realizarase na data, lugar e hora que será comunicado ás entidades solicitantes por correo electrónico con antelación suficiente.

Co obxecto de facilitar a organización deste concurso, resulta conveniente que algún representante de cada comparsa inscrita acuda a este sorteo.

**Quinta.**- O sorteo para determinar a orde das comparsas realizarase do seguinte xeito:

1.- Sortearanse en primeiro lugar para os primeiros postos do desfile, aquelas comparsas que leven entre os seus compoñentes a dez ou máis persoas con mobilidade reducidas ou en cadeiras de rodas.

2.- Sortearanse en segundo lugar, para os seguintes postos do desfile as comparsas infantís. Consideraranse infantís as comparsas con máis de 20 nenos/nenas (ata 13 anos).

As comparsas terán que indicar na súa solicitude o número de persoas con mobilidade reducida ou cadeira de rodas e o número de nenos/as que levan entre o total dos seus compoñentes.

3.- Sortearanse a continuación o resto das comparsas inscritas dentro do prazo establecido.

**Sexta.**- A concentración e o desfile das comparsas inscritas farase o sábado 22 de febreiro nos seguintes lugares e horas:

► **CONCENTRACIÓN E MONTAXE DO DESFILE (17:00 horas):** Avda. de García Barbón entre a rotonda de Julian Estevez e a rotonda de Isaac Peral.

► **DESFILE (18:00 horas):** percorrido de Avda. de García Barbón (dende rotonda Isaac Peral), rúa Policarpo Sanz, Porta do Sol (remate).

As carrozas participantes terán que estar no lugar de concentración e montaxe do desfile a hora sinalada (17:00 horas).

Aquelas comparsas que cheguen máis tarde das 17:30 horas terán que desfilar no último lugar. Así mesmo, as comparsas que pola razón que sexa, cheguen despois das 18:00 horas quedarán fóra do concurso e non poderán ser valoradas polo xurado, mais poderán participar no último lugar do desfile, se o desexan.

Dous membros da organización do Entroido 2020 recollerán a hora de chegada de cada comparsa nunha acta que será entregada ao xurado antes do comezo do desfile.

O lugar de concentración e montaxe do desfile e o percorrido do desfile e seu o desmonte pode sufrir modificacións con motivo das obras previstas na Porta do Sol e mais na rúa Elduayen. Os ditos cambios serán comunicados ás comparsas participantes con antelación suficiente polo Servizo de Festas.

**Sétima.**- As carrozas participantes no desfile de comparsas non poderán exceder das seguintes dimensións, sen contar a cabeza tractora:

**Longo: 8'00 m. / Ancho: 3'50 m. / Alto: 4'00 m.**

Terán que levar obrigatoriamente un extintor de incendios na cabeza ou vehículo tractor.

Dous membros da organización do Entroido 2020 recollerán as medidas de cada carroza nunha acta que lle será entregada ao xurado antes do comezo do desfile. En caso de que algunha das carrozas participantes incumpra as anteditas medidas quedarán excluídas directamente do desfile.

Así mesmo, e co obxecto de garantir a seguridade dos demais participantes e do público asistente, o persoal de organización e o xurado do concurso quedan facultados para excluír do desfile ou cambiar o seu posto da orde a calquera elemento das comparsas que se considere perigoso (animais de todo tipo, petardos, bengalas...).

Dous membros da organización comprobarán a altura do alumbrado instalado no percorrido con motivo do Entroido e calquera outro elemento do percorrido que poida interferir no correcto desenvolvemento do desfile, co obxecto de garantir a seguridade dos participantes e do público asistente.

**Oitava.-** Queda totalmente prohibido levar (nas carrozas ou na vestimenta dos membros das comparsas) publicidade ou calquera lenda que conteña mensaxes que atenten contra os principios constitucionais, os dereitos humanos ou a lexislación vixente.

**Novena.-** Os criterios de valoración do concurso serán determinados polo xurado, que estará composto por:

**PRESIDENCIA:** Concelleira de Festas e Turismo ou persoa en quen delegue.

**VOGALÍAS:** Dúas persoas vinculadas ás artes creativas, medios de comunicación, cultura, etc., e un membro da comisión organizadora do Entroido 2020.

**SECRETARÍA:** Persoal adscrito ao Servizo de Festas, con voz e sen voto.

O xurado terá liberdade de criterio para establecer as súas avaliación e cualificacións, pero deberá prestar atención a cuestións como: número de membros, vestuario, orixinalidade, coreografías e presenza de elementos complementarios como carrozas, harmonía, simpatía, etc.

As persoas membros do xurado avaliarán as comparsas participantes no desfile dende diferentes puntos do percorrido sen determinar, non haberá un palco de xurado.

**Décima.-** As comparsas inscritas deberán participar o día 22 de febreiro, sábado no desfile de comparsas e carrozas, e poderán participar no cortexo de acompañamento as cinzas do Meco o día 26 de febreiro, mércores.

**Décimo primeiro.-** A decisión do xurado publicarase mediante a lectura da acta ao remate do sepelio do Meco que terá lugar na Porta do Sol o mércores 26 de febreiro ás 19:30 horas. Este lugar podería sufrir modificacións con motivo das obras previstas na Porta do Sol e mais na rúa Elduayen. O dito cambio será comunicado ás comparsas participantes con antelación suficiente polo Servizo de Festas.

Será obrigatoria a presenza dalgunha persoa membro de cada comparsa participante no concurso do día 26 de febreiro, durante a lectura da acta dos premios. A non presenza desta implicará a renuncia ao premio.

**Décimo segunda.-** As comparsas inscritas non poderán levar ningún tipo de publicidade, nin lendas que conteñan mensaxes que atenten contra os principios constitucionais, os dereitos humanos ou a lexislación vixente.

**Décimo terceira.-** A concelleira de Festas e Turismo queda facultada para resolver as posibles eventualidades ou controversias que poidan xurdir e non previstas nestas bases.

**Décimo cuarta.-** Os datos das persoas solicitantes e os dos seus representantes serán incorporados aos ficheiros municipais. A finalidade da súa recollida é a instrución do procedemento do concurso de comparsas e carrozas obxecto das presentes bases, a práctica das publicacións, comunicacións e notificacións de obrigado cumprimento, o seguimento e comprobación do concurso e demais actuacións previstas nestas bases.

Ditos datos serán tratados e protexidos de acordo co previsto na Lei 39/2015, do 1 de outubro de Procedemento Administrativo Común das Administracións Públicas e na Lei Orgánica 3/2018 de 5 de decembro de Protección de datos persoais e Garantía dos Dereitos Dixitais, sendo responsable do seu tratamento o Servizo de Festas.

Os beneficiarios poderán exercer os dereitos de acceso, rectificación, cancelación e oposición ante o Servizo de Festas do Concello de Vigo.

**Décimo quinta.-** A participación no concurso supón a aceptación de todas e cada unha das bases. A decisión derivada da aplicación dos criterios de avaliación do xurado é inapelable.